

## Taitasi

Poloa Taitasifena Yisasi anagala Kaliti kumatela mainagi mo kava huo. huno huteteno haenaga aya hisiafe ani avona kaeno Taitasina amine. Yisasia faliteno hetino ikapinaga haitegeno Poloa teti talia (33) kafu agava maineno Taitasi kea kae-malene.

<sup>1</sup> Nagaya Polonae Anumaya Koti aliya kano mainoanagina Yisasi Kalaisina Aposolo kanoa mainena mani avona kaena Taitasiga negamue. Anumaya Kotia hapali-malenea veala agaife haviya amakupi maleya amametiti huya kelam-age kea havilama huteya Anumaya Koti aulaga-fina fatago huya maisayafene huno hunatene.

<sup>2</sup> Anima haviya amakupi maleya amametiti nehaya yafena kelamage kemona aepaamoa mage humaine Anumaya Kotia, havigea ohu kanoe, mukia yana talo ohuneno Agola maige maige hisaya tamahaimula lamamigahue. huno hu lokiya vaino hu-malene. <sup>3</sup> Hu-maleteno haenagaa agaia hu-malenea kanafi Anumaya Kotia, tagu tamena aligati-mainea kanogino, Mani kea hamapaiyo. huno nayapi maleneanagina mani kea huhalena hamapaitogeno efufute huno falote humaine.

<sup>4</sup> Taitasiga, Anumaya Koti keleti katenoa nafenimoga, taametiti nehua yatiamoa nagoya humaine huna mani avona kaena negamue. Anumaya Kotia Nelaafaene Yisasi Kalaisia, tagu

tamema aligati-mainea kanoene, kayone hu yaene kaipamoa falu hisia yaene kamisae.

*Taitasiga kanale vayaage mono notela soka ali hetimato.*

<sup>5</sup> Kanale ohunea yama ali fatago hisanafeene mukia kumatefe kahapai-mainoa kava huka soka vayala mukia kumatela ali heti-matesanageya Yisasi anagatela yagaisayafe Kaliti kumatela kat-alogeka mainane. <sup>6</sup> Maama nehisaya vaya ali heti-mato. Kefo yamaama veamogami amaufima omalenesia kanoe. Aama nagoke atenesia kanoe. Nafaneyagaa Yisasife haviya amakupi nemaleya neamafagami kehe Aao. huya nohisaya nafaneyagaamima mainesia kanoe. <sup>7</sup> Soka kanomoa Anumaya Koti aliya alisiafe mukia veamogami amaufina kefo yamaa omale kano maisie. Kea ohavino agaia augafa alino ohai kano maisie. Aupaa hai ovai kano maisie. Havili neno aneginagi nohisia kano maisie. Veala mo hamae me hamae nehisia kanoa omaisie. Havige huno mone alisia yafema nohaisia kanoe. <sup>8</sup> Natu vaya alino kanaleya hu neamatesia kano maisie. Kanale auava yafema nehauno akave huno agu agesale yagai lokiya vaino maisie. Fatago kano alu aotage kanoa maineno augafa ageno hayea nohisia kano maisie. <sup>9</sup> Agaiama ke-lamage kema havilinesia kea atafa huno atalako hulineno nagoa veamogami amaku amakesa ali lokiya vaisiafe ani kea hamapaino kema naneka neaisaya veamogamina Havige nehae. huno ani kea hamapaisigeya havigeamihena amakaye hisae.

*Kaliki li amunopi veamoya nagoa veamogami  
amametitia ali haviya humainae.*

<sup>10</sup> Tamage kasagoya veanea ke ohavi veane mainae. Ani veanemoya kemona aepaa ohuya afa keage maiya nehuya havigeage yaamileti mukia veamogamina aye-mavataga nehae. Aniamana nehaya veala nagoa kasagoya Yuta vayamoya Tamaugafa laga hiho. huya humainae. <sup>11</sup> Nehagi mani kema nehaya vayala Naa kea ohiho. huka kahegi-mato. Ani vayamoya moneamia havige hamapaiya yateti nealiya nagoa veamogami afamoamiene amaku amakesafima hanea kea ali haviya nehae. <sup>12</sup> Nehagi nagola Kaliti kumate kanoa, aune laga nehia kanomoa, mage huno humaineane Kaliti kumate veamoya havigea tusiya huya nehuya afai afu kana huya ke ohavi veanea felu maineya kaveage nege nege nehaya veane mainae. huno hu-maineane. <sup>13</sup> Lamage hu-maineafe kemama-kisanageya amametiti humainaya kemona atafa huya ali-talako hisae. <sup>14</sup> Yuta vayamoya havigu-nagu kene nehuya kelamage kemona amakaveno nehaya veamogami kahegi kene ohavisae. <sup>15</sup> Amaku amakesamoa oniya ohunea veamogami amaulagafina mukia yamoa oniyaagela ohunegi Yisasife haviya amakupi maleya amametiti nohaya veamogami amakupina oniyaage hu-maineaganino mukia yana oniyaage hu-mainegeneno amaku amakesamoa Ma kavala kanale yanagi atu yana havi yane. huya ohavinae. <sup>16</sup> Ani veamoya amavayaleti mage nehae Anumaya Kotina agelama hu-mainone.

huya nehayanagi nemaiya auava kavaamimoo  
ani kehena Havige nehae. huno tahapai-mainae.  
Anumaya Koti kea aliya neatagayageno kanale  
auava kava hisaya tokiyaamia omalegeno  
Anumaya Kotia amakaifena tusiyate nohaiye.

## 2

### *Kosuna alekanomo-gamife humaine.*

<sup>1</sup> Kagaya Taitasiga akave malesayafe kelamage  
kea huhaleka hamapaiyo. <sup>2</sup> Vayatamamo-  
gamina mage huka hamapaiyo Havi lina  
netama aneginagia ohiho. Tamaku tamakesale  
yagaitama tokiyaage hiho. Yisasife havitama  
lamakupi malenaya yatela tokiya vaitama  
maiho. Veafena tamahau tamayamopafi  
nelamahaisia kavaage hiho. Kana yama falote  
hulamatesigetama tokiyaage hutama hetiho.  
huka huo. <sup>3</sup> Ania huka alekano-gamifena  
hamapaiyo Anumaya Kotina haisia kava  
nehutama alumo kea alitama atifi mafi ohiho.  
Havilina netama aneginagia ohutama kanale  
auava kavakeya amaveliho. huka huo. <sup>4</sup> Amave-  
lisageya yauva anemoya anauamimo-gamiene  
nafaneyagaa-miene amakuama amamisayafena  
havigahae. <sup>5</sup> Haviteya amaku amakesale  
yagai lokiya vaiya maineya alu velela ouya  
anauamimo-gami amaiyafinaga maineya no  
kumaamiene nafaneyagaamiene kanaleya huya  
yagaiya maisayana nagoa veamoya Anumaya  
Koti kemofe Afa kea havi ke hane. huya  
ohugahae.

*Taitasia kanale auava kava hinageya neyave-moya akave hisae.*

<sup>6</sup> Ania huka neyavemo-gamina tokiyaage kea mage huka hamapaiyo Tamakaitami tamaku tamakesale yagaitama tokiyaage hutama maiho. huka hamapaiyo. <sup>7</sup> Kagaya mukiamana nehana auavakaa kanale kavaage hisanageya kakave maleya visae. Visageka fatago kavaage nehuka kanale mono kema hisanana afa kea ohuka kage-safima havilama hu-mainana keage huhaleka hamapaiyo. <sup>8</sup> Kelamagea hisanageya kame vay-atimoya Havige nehane. huya hisaya keamia omaleisigeya tusia amakaye hugahie.

*Aliya vayamoya kava vayaamimo-gami ke akave maleho.*

<sup>9</sup> Aliya veamo-gatama mukia kanafina kava vayaamimo-gami amaiyaafi maisageya kavaamimoya muse hu-mainana kava hutama amakaifena amakavelaga kefo kea ohiho. <sup>10</sup> Haviva yaamiene monene musufayana ohutama efi efi hutama kanale kava hisageya kava vayatamimoya tagu tamema aligati-maina Anumaya Koti kea alisaga huya havisaya amaku amakesa hanegahie. huka hamapaiyo.

*Tagaya Anumaya Koti auavala akave nemaleta Yisasima esiafe agava maisune.*

<sup>11</sup> Veamogami amaku amamema aligatisiafe Anumaya Kotina kayone yamaa ago efalote humaine. <sup>12</sup> Efalote humaineno Anumaya Koti auava ya akave omaleisunafeene mopafi yafema age lahayehisuna kefo kavafeene takaveno hutesuna yafe lave-neliye. Menia ma kanafina

lagu tagesale yagaita tokiyaage huta maineta fatago huta kaana vaiyesuna kavala lave-neliye.

<sup>13</sup> Lagu tamema aligati-mainea Anumayati Yisasi Kalaisia hale yamo tokiyaaene efufute ataleno evayi hisiafene huta tametitia nehuta muse huta agava mainone. <sup>14</sup> Kefo kavama maita nehuna yamo nofila hulatenegeno tagu tamema aligatisi-afene huno Yisia agaia augafa hakino fali-maine. Ani kefo yapiti alino kalu helateno lavayu hisia miya ataleno fali-maine. Lavayu huteno mukia kefo yatia ago aye hami-lategeno taguamoa efeage higeta agaia veane mainonafe tagaya taya mukiki huta kanale aliya alisunafene huno fali-maine.

<sup>15</sup> Manima hua kea tokiyaage huka veamogamina amaku amakesa alika amakafa hugeya haviya lokiyaage huya akave malesae. Havigu nagoa veamoya kagaife Afa kano mainane. huya hugateyafenagi kagaya tokiyaage huka maiyo.

### 3

*Tagaya hetita tokiyaage huta kanale kavakeya hisune.*

<sup>1</sup> Mukia veamoya ala Kamani kava vayamogami amaiyaafi maisayafe ali-makafa hisanageya amakai kea akave maleya kanale auava kavakeya hiho. <sup>2</sup> Nagoa veamogami amakia hu haviya hu oamatetama tamaipa falu yapi maiho. Tamaugafa alitama ohaitama mukia veamogamina ali kayone humateho. huka hamapaiyo. <sup>3</sup> Nayona tagayaenena

aifonafo lagu tagesa havita Anumaya Koti kea akave omalonageno Satania aye-lavataga higeta lagaiti age lahaye huna kefo yaene taugafamo muse hia yamoene tatafa huno atalako higeta ani nofipi maineta veafe havita haviya humateta alumogami yatefe age lahaye hunageya veamoya lagaila tusiya huya kamea hu-latenayanagita ania huta kame huta mainone. <sup>4</sup> Naa huta mainonanagi lagu tamema aligati-mainea Anumaya Kotia kayone hisuna yamaaene tagaife hau ayamopafi hau-mainea yaene taveli-mainea kanamoa vayi higeno tagu tamena ago aligatimaine. <sup>5</sup> Tagayama fatago kavama humainona yateti tagu tamena ali okatinegi tagaifena agaia hauma hulatenea yateti kefo yatia aye hami-lategeno Alu Aotage Avamumoa haegafa tahaimula ago tamigeta haegafa veane mainone. <sup>6</sup> Mainonageno lagu tamema aligati-mainea Yisasi Kalaisia fali-mainea yateti Anumaya Kotia Alu Aotage Avamula ago ali helafino lamine. <sup>7</sup> Tamineafe Kalaisia agaia kayone hulatenea yateti tagaifena Nagaini fatago veane mainae. huno hu-lateteno maige maige hisuna tahaimula tamineanagita agaima agesunafe tametitia nehuta agava mainone. <sup>8</sup> Mani kemoa kelamagelafa haneafe nagaya musekaa nehugi Anumaya Koti veamogamife mani kea huhaleka hulokiya vaika huo. Anumaya Kotife amakupi malenaya veanea kanale auava ya huya hetiya tokiyaage hisayafe mani kea huhaleka huo. Ani yamoa kanaleya huno mukia veala amaya

hugahie. <sup>9</sup> Amaya hugahigi keoke kaoke kene agili kene tototamimo-gami amakile kene kahegi kemofeene hatagetama ke ovai avai ohiho. Ani yamoa tagaila laya huno nago augafa kanale yana otamigahie. <sup>10</sup> Nagoa veamoya mono keleti ke ovai avai huya ali haviya nehisaya veamogamina amakesa alio. Aliteka tole kanalema hisanageya kekama ohavisageka afaa neamataleka kakaveno humato. <sup>11</sup> Naa veamoya Anumayamo kafena neataleya amakaiamima kefo kavama haya yafe amakaiami amakuamoa kaiyekea humatene huta ago havimainone.

*Poloa Taitasife Me nago. huno humaine*

<sup>12</sup> Nagayama Atemasipi Tikikusipi hunatesugeana kagaitega uvayima hisaageka kagaya aupaa nagaitega Nikopolisi kumate eno. Nagaya Nikopolisi kumate tani kotisia kanafina maisua nagesa nehie. <sup>13</sup> Apolosiene kahegi kema havilinea kanoa Senasiene kava hunateka katema visaageka anaya hisanageana nago yafena ati oayeana visae. <sup>14</sup> Tagai veamogamina mukia yaamima omalenesia veala hamamaesayafe kanale aliya alisae. Na kavama hisayana kanale alagaa ayegahae.

<sup>15</sup> Nagaienema mainaya veamoya Mainafio? huya hu falu fala hugatae. Anumaya Koti kema aliya amakupi malenayafenagiya tagaifema hamaiya veamo-gamifena Mainafio? huya hae huka hu falu fala humato. Anumaya Kotia kayone hisaya yamaa tamamisie.

Kenia male hano hie.



Nagaini nagia Polonae.

**Anumayamo'a Haegafa Alino  
Hagelafilatenea Kea  
The New Testament in the Kanite Language of Papua  
New Guinea  
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

---

PDF generated using Haiola and XeLaTeX on 11 Nov 2022 from source files dated 30 Nov 2021

55807fd5-1005-5405-89da-5533a7950c65